

WILLIAMS, WILLIAM ('Gwilym Cyfeiliog'; 1801 - 1876), bardd, englynwr, ac emynydd

Enw: William Williams
Ffugenw: Gwilym Cyfeiliog
Dyddiad geni: 1801
Dyddiad marw: 1876
Priod: Mary Williams (née Evans)
Priod: Mary Williams (née Morris)
Priod: Anne Williams (née Evans)
Plentyn: Richard Williams
Plentyn: John Williams
Rhiant: Mary Williams (née Roberts)
Rhiant: Richard Williams
Rhyw: Gwryw
Galwedigaeth: bardd, englynwr, ac emynydd
Maes gweithgaredd: Crefydd; Barddoniaeth
Awdur: William Emyr Williams

Ganwyd 4 Ionawr 1801 yn y Winllan, Llanbryn-mair, mab Richard Williams ('cyngorwr' gyda'r Methodistiaid Calffinaidd) a Mary Williams (un o ddisgynyddion [Henry Williams](#), Ysgafell, a chwaer y [Parch. John Roberts](#), Llanbryn-mair), a brawd hynaf y [Parch. Richard Williams](#), Lerpwl. Addysgwyd ef yn ysgol ei ewythr (uchod) ac yn ysgol [William Owen](#), Trallwng. Dychwelodd gartref i'r Wig i helpu ei dad ar y ffarm ac ym musnes melinydd gwlanenni. Daeth i feddiant o ychydig dai a thir a ffatri wlanenni yn Bont Dolgadfan, a symudodd yno tua 1822. Am gyfnod daliai'r swyddi o glerc festri, goruchwyliwr cynorthwyol, a chofrestreidd y plwyf. Bu'n briod dair gwaith - (1) 1828, ag Anne Evans, Minffordd; (2) 1834, â Mary Morris, Dolgwyddyl, Trefeglwys (o linach [Elystan Glodrydd](#)); (3) 1845, â Mary Evans, Tynllwyn, Llanbryn-mair. Bu iddo 10 o blant - ef oedd tad [Richard Williams](#), Celynog, Drenewydd. O 1823 ymlaen ceid darnau barddonol o eiddo ' Gwilym Cyfeiliog ' yn aml yn *Y Dysgedydd*, *Goleuad Cymru*, *Y Drysorfa*, *Seren Gomer*, a'r *Gwyllyddydd*. Yr oedd ei awdl ar ' Sefydliad Coleg Dewi Sant ' yn ail yn eisteddfod Caerfyrddin, 1823, pryd yr enillodd '[Daniel Ddu o Geredigion](#)' y brif wobr. Enillodd y wobr yn eisteddfod Llanfair-caereinion yn 1826 am ' Englynion i'r Wybren Sernog.' Rhagorai fel cyfansoddwr ar y mesurau caethion, a chyfrifid ef yn englynwr da. Y mae ei emyn, ' Caed trefn i faddau pechod yn yr lawn ' yn adnabyddus, ac fe'i cyfieithwyd yn iaith brodorion Bryniau Khasia. Bu farw 3 Mehefin 1876 ym Mhont Dolgadfan, Llanbryn-mair. Cyhoeddwyd casgliad o'i weithiau yn 1878 o dan y teitl *Caniadau Cyfeiliog* gan ei fab, [Richard Williams](#), Drenewydd.

Awdur

William Emyr Williams, (1889 - 1958)

Ffynonellau

R. Williams, *Montgomeryshire Worthies* (1894)

Archifau LIGC: [Bontdolgadfan \(Williams family\) Papers, 1741-1920](#)

Y Cronicle ('S.R.'), Medi 1876

Darllen Pellach

Erthygl Wicipedia: [William Williams \(Gwilym Cyfeiliog\)](#)

Dolenni Ychwanegol

Wikidata: [Q13132362](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

